

Yeshua un Israelita; E Bon Propósito di Dios!!!

E Lei di Yeshua ta nifiká; e Enseñansa di Yeshua; e Preseptonan di Yeshua; e Mandamentunan pa abo tin Éksito; E Bon Propósito di Dios!!!

Yeshua un Israelita; E Bon Propósito di Dios!!!

Dios no ta manera hende, E no sa gaña, E no ta manera yu di hende, E no ta haña duele di loke E bisa. Lo E bisa un kos, keda sin hasié? Primintí algu i keda sin Kumpli kuné? EL a duna mi òrdu pa Bendishoná i si EL a Bendishoná, ami no por kita e Bendishon. Ningun desgrasia no ta menasá pueblo di Yakob. E Israelitanan no tin nodi di tin miedu di desaster: SEÑOR, nan Dios, ta Protegé nan; E ta nan Rei Famoso. (Numbenan 23:19-21).

Rumannan, tin un sekreto ku mi ke pa boso sa, pa boso no kere ku boso ta sabí. Un parti di e Israelitanan su Kurason a bira duru i lo keda duru te ora e kantidat di no Hudiu ku mester haña Salbashon drenta. Ora esaki sosodé, henter Israel lo haña Salbashon, manera Skritura ta bisa: 'E Libertadó ta bini di Sion, lo E kita maldat di e desendentenan di Yakob. Esaki lo ta Mi Aliansa ku nan, ora Mi kita nan pikánan.' (Romanonan 11:25-27).

Yeshua un Israelita; E Bon Propósito di Dios!!!

Awor aki den 2021 abo por ta puntra abo mes kiko e Bon Propósito di Dios ta i pakiko abo no ta mira e Bon Propósito aki den abo su Bida?

Ora ta trata di e Bon Propósito di Dios, e Hudiu por ser konsiderá di ta enemigu di Dios dor di historia, pero esaki ta e sekreto ku Sha'ul ta papia di dje. Sha'ul ta un Hudiu, un Israelita ku e mundu di Kristianismo konose komo Pablo. Sha'ul a bisa no kere ku abo ta sabí, pasobra ta Un parti di e Israelitanan su Kurason so a bira duru, pa asina abo por haña e Oportunidat pa aseptá Yeshua un Israelita komo abo su Salbador; E Libertadó ku a bini di Sion. (Isaías 62:11-12).

Ora ta trata di Skohementu, e Israelitanan ta esnan Stimá pa Dios, pasobra EL a Skohe nan antepasadonan. Ademas un otro parti di e Israelitanan si a aseptá Yeshua komo nan Salbador; E Libertadó ku a bini di Sion. Pues Dios no ta tuma bèk loke EL a duna, ni E no ta kambia di idea tokante esnan ku EL a yama. Awor aki mas i mas Hudiu ta bini na Aseptashon di Yeshua komo Esun Ungi, djis manera Filipino a bisa Natanaèl: 'Nos a topa Esun ku tantu Moises den Lei komo e Profetanan ta papia di djE. Ta Yeshua di Nazarèt, yu di Hosé.' (Juan 1:45).

Ora ta trata di e Israelitanan nos mester Realisa ku Dios ta un Tata Fiel, E no sa gaña. Dios Su Si ta un Siguridat Balioso, loke EL a Primintí na Abraham den Génesis 17:5-6 te ahinda ta na vigor. Dios a Primintí un Rei anto EL a manda un Rei; Yeshua un Israelita; E Fieldat di Dios!!!

4 yüli 2021

**Sea Bendishoná ku e Amor di Dios Tata; Yeshua Mesias
Un Fiel Sirbidó di Dios,
Remsly L Riley.**